

現代名家創作

現代名家詩選

汪君寒先生編



上海達文書店印行

## 現代名家詩選自序

愚素好詩。曩蒙章師行嚴先生所激賞。甚示寵異。近愚學雖未進。然以深感詩之選事爲未可緩也。况夫詞人輩出。藻什琳琅。取則伐柯。會心不遠。茲輯現代名家最近之作。凡得有四十六人。顏曰現代名家詩選。空山流水。曲有心知。春夕秋朝。得非素侶。鑿八珍者。始足以言味。聆簫韶者。始足以論樂。則茲編所選。必能當於舉隅之用。是在讀者善自體悉而已。編校既竟。謹弁數言。大雅匡正。是所跼騰。

民國廿四年五月安徽旌德汪君寒序於合肥

## 現代名家詩選序

夫詩稱正始。代有推遷。刻羽移商。法近斯遠。吾友君寒先生近輯現代名家詩選一書。多至四十六人。體製美備。而世之言詩者。亦可以知所取則矣。先生論詩持律極嚴。選詩則務主於寬大。門戶結習。至此而融。瀚浩如川。遺珠不棄。此固善選詩者之要旨。亦知先生學養之所在矣。今聞書將由上海新文化書社出版。將來風行之盛。必可預言。壹曲冰絃。恣人心賞。又必人人以先覩爲快。皆可於吾言卜之矣。謹爲序之。其亦先生之所許乎。桂林薛承翼序

現代名家詩選題辭

徐春祈題

不向詩城自策勳才人餘事早傳聞  
殷懃爲覓鈔詩使寫與東南一段雲  
早知物色自風塵一曲空山意苦辛  
卻有閒懷忘未遠眼前針渡與何人

凌鴻飛題

刻意良工苦笑啼一編珠玉已如迷  
十年曲有江南好願與蠻牋護舊題  
親見西江派萬殊不曾閒卻是詩圖  
眼中最有年時事得似西風入社無

## 現代名家詩選編輯緣起

一現代名家輩出。詩什如林。本編所選。皆係各名家最近十餘年精采之作。尤爲外間不易輕見之稿。彌爲可貴。

一黨國名人以詩著稱者。本編廣爲搜采。無美不備。

一柯鳳孫氏於史學最負盛名。所有詠史各詩。苦不易見。本編旁搜博采。尤助讀者興趣。如書中所選釣魚城行一詩。卽爲詠史詩中得意之作。

一古體近體。各依各家。分類錄選。利便讀者。易窺門徑。

一取法貴近。本編悉以時賢爲限。以便讀者易於明瞭。一時之作者風氣。兼得事半功倍之益。

## 現代名家詩選例言

一、本編選詩標準。以搜集現代名家時間最近作品爲原則。各家采錄。多寡不一。沾溉後學。爲益匪淺。

一、本編全書。悉加圈點。以省讀者腦力時間。洵藝苑之津梁。修辭之祕鑰也。

一、所選作家有已故者。本編仍行采入。以示崇尚先賢之旨。

一、作者姓氏籍貫。另列簡表。以爲讀者知人論世之助。

一、本編不分卷次。只就各個人爲單位。以一人爲起訖。最有統系。易於檢閱。

一、編中選詩次第。以所選時間先後爲序。不分軒輊。讀者諒之。

現代名家詩選作者姓氏簡表

章炳麟字太炎浙江餘杭

章士釗字行嚴一字孤桐湖南長沙

梁鴻志字衆異福建長樂

樊樊山字雲門湖北恩施

王揖唐字逸塘一字什公安徽合肥

曹經沅字纒蘅四川綿竹

周達字梅安徽建德

黃節字晦聞廣東順德

梁任公字卓如廣東新會

胡漢民字展堂廣東番禺

于右任陝西三原

現代名家詩選

王陸一陝西三原

汪兆銘字精衛廣東番禺

譚延闓字組安湖南茶陵

邵元冲字翼如浙江紹興

謝无量字无量四川樂至

陳樹人未詳

陳小蝶未詳

柯劭忞字鳳孫山東膠縣

江伯瑟安徽合肥

江絮生安徽合肥

李家煌字駿孫安徽合肥

陳三立字散原江西義甯

汪榮寶字袞父江蘇元和



現代名家詩選

陳衍字石遺福建侯官

朱古薇字薑村浙江歸安

姚華字重光貴州貴筑

黃侃字季剛湖北蕪春

王國維字靜安浙江海甯

秦樹聲字晦明河南固始

冒廣生字鶴亭江蘇如皋

曾學孔字小魯四川筠連

陳詩字子言安徽廬江

陳寶琛字伯潛福建閩縣

段祺瑞字芝泉安徽合肥

吳鼎昌字達詮浙江吳興

梁敬鐸字和鈞福建長樂

現代名家詩選

呂美蓀安徽旌德

楊圻字雲史江蘇常熟

邵瑞彭字次公浙江淳安

諸貞壯字貞長浙江紹興

嚴修字範孫天津

呂惠如安徽旌德

呂坤秀安徽旌德

殷齊德字滌甫安徽合肥

養素女士未詳

現代名家詩選目錄

- 章炳麟七律一首 五律一首 七古一首  
章士釗七律七首 七古一首 五古一首  
梁鴻志七律二首  
樊樊山七律五首  
王揖唐七律四首 七絕五首  
曹經沅七律四首 五律一首 七絕四首 七古一首  
周達七律三首  
黃節七律四首 七絕五首  
梁任公七律一首  
胡漢民七律二十二首 五律八首 七絕五首 七古一首 五古三首  
于右任長歌一首

現代名家詩選

王陸一七律一首 七絕四首 七古一首 五古一首

汪兆銘五古一首

譚延闓七律一首 五律四首

邵元冲五古一首

謝无量五律二首 五古一首

陳樹人五古一首

陳小蝶七絕十三首

柯劭忞七律六首 七絕六首 七古二首 五律一首 短歌一首

江伯瑟七律六首 五律一首

江絜生七律六首 五古二首 七古一首

李家煌七律二首 五律五首 七絕一首

陳三立七律二首

汪榮寶七律二首

現代名家詩選

陳衍五律二首

朱古薇七律二首

姚華七律二首

黃侃七律二首 七絕四首 五古一首

王國維七絕二首

秦樹聲七律一首 五古一首

冒廣生七律二首

曾學孔七律一首 五古一首

陳詩七律一首 七絕一首

陳寶琛七律一首 五律一首

段祺瑞七律一首 五古一首

吳鼎昌七律二首

梁敬 七古一首

現代名家詩選

呂美蓀七絕三首 五律一首 五絕二首

楊圻五律二首

邵瑞彭七律三首

諸貞壯七律二首

嚴修七律三首 七絕一首


呂惠如七律四首

呂坤秀七律一首 五律一首

殷齊德七律二首 五古一首

養素女士七律二首

現代名家詩選



# 現代名家詩選

旌德汪君寒編輯

章炳麟太炎詩選

答行嚴元日寄詩

十年誓墓不登朝。爲愛湖湘氣類饒。改歲漸知陳紀老。量才終覺陸雲超。長沙松菌無消息。樊口鱸魚乍寂寥。料是瀛洲春色早。羈人樓上更招招。

題吳北山先生篋扇

漸識吳君遂。高情棄直廬。卜居梅福里。草上杜根書。域外稱張楚。斯人願伏蒲。修門遺燼在。誰共弔三閩。

題會澤朱氏雙節撫孤圖

朱提之銀天下重。朱提士女當者無。朱提八姓有朱氏。綿歷漢晉懸絲如。城燒赤口播飛語。阿翁死獄身非辜。有男四歲鬼瞰室。盛年流落猶遺雛。偉哉二母抱霜雪。婦唐上繼威姑盧。大宗世譜越千



載。艱危能勿存其孤。綢繆田宅形已疲。密儲毒藥心爲枯。慈烏寡鵠世常有。斯人於古誰爲徒。爽道周左兩全節。引刀割鼻留型模。漢縣十二本同郡。遙遙絕代如相呼。

章士釗行巖詩選

喜聞南社中興寄懷佩忍亞子

南社南朝勝一時。卅年甘苦幾人知。喜聞士女趨花塢。還見風流擅劍池。無已門開傳舊句。敬亭書好動深悲。微嫌得失文章事。說到橋山稍費詞。（自註：冷香閣宴集啓中有橋山弓劍未及攀號句。）

重十簡纓蘅

秋風容易一年年。每到佳辰思定牽。重十漫前重九節。無情難住有情天。偶遊聞樂爭先避。失臥緣詢說熟眠。此意問誰能領略。建安詩客似相憐。

寄懷印泉蘇州

故將軍是李將軍。作客蘇臺久不聞。跡浸疏時情轉密。矜全化去子能羣。一心會有成功日。兩地同看不盡雲。吾近能詩亦奇絕。快將心事寫存君。

倫敦郊居寄懷纓蘅

廿載天涯去復還。郊園小小足舒顏。野眠獨意憐幽草。曉坐枯眉潤遠山。憂國不彈無益淚。讀書甯爲有心閒。來禽怪少門前客。側目窗櫺代款關。

太平洋舟中賦贈吳禮卿

浩氣當空月一鉤。太清虛混太平舟。倦游王粲誰青眼。鑿空張騫已白頭。乍覺同行輸李郭。更驚俱逝感陳劉。劫灰欲盡心難冷。且喜吳剛斧未收。

題黎雍詩卷

松客新詩到我前。開窗一讀一鏗然。夜聞邊馬悲何極。意託湘流哭亦緣。綿蕤願興炎漢禮。儒林難待伏生年。如君俊少天生幾。竟後斯文著此賢。

倫敦冬雪寄懷君寒六安州

大海荒荒意萬端。連朝雨雪想君寒。天生詞筆英年健。亂世襟懷達士寬。樸學祇今崇戴震。高風從古屬袁安。詩中莫過拋心力。白嶽黃山要仰看。

歸自歐洲纒蘅見贈長歌依韻奉答

平生喪功不喪氣。挾策投荒兩三至。去後翻成逐客悲。無慘又譯佞盧字。初到倫敦更柏林。兩載悠

悠同一寐。山暝獨遊忘所往。夜午鄉思潛墮淚。書拙私傷已老翁。囊空幾悔爲廉吏。生就孤懷百不改。焉勞鬼物來嘗試。世風如此其可已。人不我遺且自棄。小大霄淵一例觀。何事侈談鴻鵠志。歛來二友訪遷謫。驅車平挹博塘翠。殷勤爲計入修門。新陸假途如縮地。吾本江南憔悴人。浮世紅蕖等遊戲。朋簪固自諧金石。人過何妨喜魑魅。我今歸國一月餘。稍理齋頭書幾笥。去何所聞來何見。太炎發問真好事。唯君憐我兼達觀。胡亦聽人謂吾晬。海藏長年才益茂。此老木強出天賜。餘情及君恣贈答。味隆醇醪天下醉。自傷遲暮親章句。倘其許我執君轡。

示姪

憶余十八時。喪母出敝廬。勉作童子師。舍館二載餘。一載三節分。每節銅十株。全家鹽米資。取給不須臾。月錢四百個。號余櫛髮需。且裂其半焉。爲家備糧儲。汝父年十四。新鬢試爲徒。跣跣迓大令。脫籍在中途。廢學余大恐。相將返舊閭。舉家憂惶惶。辭俸食家蔬。茹苦吾不悔。勤勤課弟書。未曉挑燈讀。夜深猶喁喁。教學起有功。一日千丈趨。是歲爲辛丑。涉冬吾以瘡。晨漱嘗得血。乃姊哭向余。謂此更半歲。吾其隨臘枯。勸吾遠行役。善保無貲軀。貺我三十千。擇日俾戒塗。吾心重感激。杖策下三吳。弱弟無與立。仍挈與之俱。透遲出鄂城。沍寒絕行艫。瑟瑟仲宣樓。四顧一長吁。蕭然下孤館。一笠招

現代名家詩選

如豬。日費各百廿。齋食苦如荼。處窮志益淬。誦聲仍鏗如。天涯兩貧生。館人日追租。欲赴四門學。往往生齟齬。日暮寒風起。相抱呼嗚嗚。吾憤漫投止。傭書紫江朱。月負五竿返。急難迄未紓。明年春三月。親友紛東徂。江邊繫班騅。妹曰晉契蘇。遽與吾妹見。涕淚同沾濡。爲捐買舟資。兄弟得南圖。從茲習戎馬。尋奔扶桑都。吾又泛海行。花萼東西殊。此後六年間。勵志各前驅。燁燁兩瑤島。迢迢雙鯉魚。歸國並聞政。蓄志亦未舒。汝生漸解事。何止一二喻。浮世等紅蕖。流光悲白駒。偶憶微時艱。夢寐泣東隅。平生受恩重。妹暉姊申嫗。所餘身與手。幸不爲懦夫。汝年近二十。從未習艱虞。居不置衣食。疾輒相扶持。位業累千門。所慮唯志無。一身百不憂。所需唯勤劬。吾年二十四。始學爲佞盧。汝與時地會。質學邁曩儒。境好汝何酬。平旦膺試拊。汝近何所爲。甯足宗戚愚。汝父骨未寒。汝母絕歡娛。日望汝成人。而汝日狂且。汝近投荒歸。慘怛從天呼。大病幸得全。此心甯不虛。汝質初匪惡。發憤可輯吾。坐令美錦壞。將是誰之辜。良時不再來。流俗安可居。持金誤堪恕。盜璧眞足誅。戒汝愧無方。如馬蓋已瘖。君親終且盡。何況叔姪乎。生業吾夙拙。罷官尤不敷。獨至教誨事。節食志未渝。子姪賢固佳。不賢亦云胡。吾盡吾義耳。責善母乃迂。吾今不汝譴。唯表意區區。非云述己德。聊使察菑畲。昌黎祭郎痛。少游誠姪初。人生百可棄。倫理安能誣。

謹註。行嚴夫子此作。嘉言名語。足詔後昆。百復之餘。惕焉加敬。願與天下子弟共讀之也。君寒謹識。

梁鴻志衆異詩選

贈吳北山先生

吾道要爲天下裂。知君恨不十年前。相逢三伏有寒意。脫手千詩皆可傳。天際輕陰餘護惜。斜陽衰柳費喧妍。杜根心跡無人會。豔說香雲一笑嫣。

重九日纒蘅秋岳醇士招同掃葉樓登高余不克赴分得雄字

了事癡兒近已翁。閉門留眼看霜紅。清尊又負重陽約。破帽長依一畝宮。諸子真游餘涕淚。神州前路付苓通。何時強起登嵩華。待與鍾山角長雄。

樊樊山雲門詩選

歲暮

歲暮天荒地冷時。杜門老子尙兒嬉。筆乾幸得碑銘潤。裘典差償酒藥費。梅有精神多爲雪。茶因清苦最宜詩。作命未得王陽術。奢與廉兼亦大奇。

時時相顧拂箏絃。萬炬紅蓮雪霽天。雀躍徑從佳客召。龍鍾偏得美人憐。紫裘橫笛坡生日。玉殿垂楊緒往年。也識洛陽春色麗。有花無葉不成妍。

三朝看雪捲珠簾。雪後奇寒一倍添。瑞葉彌天催白戰。梨花滿地覓青罕。打門鹽米無多債。媚竈糖瓜滿意甜。十二月中今月好。牀頭夜夜見銀蟾。

七世將家三楚少。獨余投老戀青氈。墨梅落瓣圖三九。竹葉消寒斗十千。鶉鴿青添煨芋火。羊羔美入煮茶天。不當更作劉郎會。走馬朱樓鬪管絃。

同樸公過笏卿共飯

閒策羸驂過左家。滿窗晴日綠陰斜。寫詩紙已盈書篋。沽酒錢仍費畫叉。陳毅飯增荒後量。劉賁菜現榜頭花。盤餐總有江鄉意。漑釜烹魚碗覆蝦。

王揖唐逸塘詩選

海藏出示九日登高之作卽席奉和並柬弢老惜仲行嚴次公纒蘅諸君

污塵撲面去仍來。寂寂秋心動百哀。天遣憂危甯啓聖。世除驕吝已無才。閒身人合詩中老。對手棋從劫後猜。同室苦難垂涕道。漫持禹稷薄顏回。

疊韻再柬海藏樓主並示同人

兵塵霜吹逐愁來。斫地高歌且莫哀。年近知非殊未老。天因有用始生才。心期甯借風雲壯。目論真成燕雀猜。試溯銀河瞰滄海。依稀已見曙光回。

和夜起庵卽事

抱膝閒吟戀小庵。孤芳甯計世人諳。普天夢夢君先覺。中澤嗷嗷戰尙酣。縱化蟲沙猶是劫。只餘風月不堪談。首陽千駟前言在。薇蕨由來苦亦甘。

歸途寄柬纒蘅卽次其韻

不負登臨是此行。孤蹤轉畏俗人驚。肯因卒歲妨清興。聊喜尋詩續舊盟。海水恰同僧入定。山禽如勸客歸耕。何當招得津沽月。共子聯床話鳳城。

老友孤桐設宴爲其夫人弱男女士四十壽徵詩勉拈四截句報命媿不能爲泛泛祝詞也

灼灼雲霄一女星。亞東模範好家庭。自由底事標新語。墨雨歐風那忍聽。庶下辛勤老孟光。偶耕素志倘能償。浮家何似歸田樂。好種成都八百桑。君家家事吾能說。感舊何當傳北山。竊喜中郎今有女。楹書猶護舊琅環。白首相期共歲寒。因君我亦感無端。難忘天壤傷心語。春夢三年總未闌。

癸酉重九日集清涼山掃葉樓以龔半千半畝園詩分韻纓蘅代拈人字  
插花落帽皆騷客。掃葉登樓孰主人。我與半千緣不淺。玉峯例得認鄉親。

曹經沅纓蘅詩選

次韻答海藏樓主九日登高之作

戰雲又逐羽書來。說到江南意已哀。秋晚菊猶能作健。時衰天亦靳生才。中宵每爲荒鷄舞。遠志甯教腐鼠猜。老去善夫饒霸氣。筆端力挽萬牛回。

逸公歲暮薄游海濱賦此奉柬

衝寒小作看山行。姓字真妨估客驚。萬事無如求野獲。一年強半與鷗盟。儘收冰霰供詩料。且伴漁樵話耦耕。別有江湖憂樂意。看人簫鼓競春城。

除夕喜得逸老和詩賦答仍次前韻

眼底何人不夜行。逃名轉畏世兒驚。鬢霜已訝殊方識。心跡唯堪止水盟。守歲肯教妨美睡。洗兵準擬看春耕。錦衣玉貌匆匆事。十六年來客帝城。

今傳是樓雅集分韻得情字賦呈逸老並柬同社諸君子



補天事業出儒生。開府歸來擁百城。亂世苔岑珍氣類。少年湖海悔詩名。題襟尙有貞元侶。變雅能追正始聲。末坐黃裳吾豈敢。明簪惓惓媿深情。

次韻答海藏樓主

廿載樓居慣。眞成舉目非。才爲三絕掩。量似百川歸。失鹿關天意。飛鴻悟道幾。嚮辰終未遠。漫訝曙光微。

觀音寺雜詩四首

倦飛早已息南溟。甯待疏鍾喚夢醒。無限世緣捐不盡。年年媿汗對山靈。潭影山光自古今。一經道破見詩心。媿無少府驚人句。幾度攢眉未敢吟。滄海橫流劫未闌。回天孤抱託吟壇。一篇鄭重留山寺。便作東坡玉帶看。過溪幾步卽禪林。不斷山禽送好音。祇有蒲團無梵貝。圓機且向靜中尋。

癸酉九日招客清涼山掃葉樓登高以龔半千半畝園詩分韻得事字

游車填咽靈谷寺。誰愛清涼有殊致。僧樓占斷一山秋。憑檻江天娛坐對。斜陽終古不移影。十廟興亡送鴉背。我來白下訪殘僧。卻喜逢辰共高會。連陰頓霽倚關天。過午岩腰客聯袂。西江一老笑口開。此會疑爲此邦最。逃虛肯信人跡稀。搏沙翻慶德星萃。世兒攘臂論洛蜀。豈識九州皆氣類。諸賢

都是過江人。莫對新亭攬危涕。明年此日更登高。一任悠悠嘲好事。

周達梅泉詩選

寄太夷丈天津

文成經進付誰鈔。海雨離居想寂寥。事去重光哀故國。心蘇臣甫戀行朝。癸籤詩雜初中味。丁字沾分上下潮。人厄天窮兩無悔。看君一羽傍雲霄。

重九清涼山雅集纓蘅代拈吟字

背城蕭寺帶疏林。掃葉人來抱膝吟。樓與頽陽爭旦暮。天圍暝色上衣襟。江山不盡逢辰恨。猿鳥猶疑出世心。我自攢眉愁入社。閉門只共酒杯深。

用前韻再簡纓蘅白下

西風一夜亂霜林。冷坐僧房擁鼻吟。日落江光初曳練。樓高海色欲親襟。殘秋如送將歸客。逝水難迴不轉心。愁絕秦淮舊時月。年年留照劫痕深。

黃節晦聞詩聲

初聞蟬聲

樓對高枝失地陰。歛然蟬翼鼓微吟。暑中休沐閑閑意。天外飛鳴泯泯心。勞苦可曾知有雪。反歸吾已戒聞琴。繁絃聒耳何從意。更曳殘聲入夜深。

中秋夜獨遊北海對月作

余意翩翩與月生。月明誰解是宵明。人天消息今成阻。絃望安排化未更。湖艇張歌寥落見。宮鴉離樹再三鳴。悲懷不爲思鄉動。况有微吟繼倚聲。

秋涓北來視余四月六日置酒社稷園賞牡丹作

風力初低雨意輕。爲花何愛一春晴。回陰莫展丁香結。廢閨難催芍藥生。塵土牡丹黃上額。殿台楊柳碧連城。眼前草木枯榮態。與汝盱衡說舊京。

冬夜

餘臘春回未解寒。嚴更初爲汝花寬。賸梅數閨開還勒。舊雪除冬落愈殘。凍巷萬家爐火絕。廢城三苑海波乾。明朝羣稚嬉冰樂。倚賴東風不做難。

題曼殊遺畫

亡友遺縑三十年。秋墳宿草日芊芊。夕陽只在黃昏候。依舊江樓負手前。

絕句

白眉燕子黃兩脚。黑頭楊柳青數枝。欲使羣蟲無翠羽。日燃爆竹更彈棋。

送唐天如南歸

亂中來見豈尋常。對別經旬語更傷。莫作杜陵歸蜀計。本無人識浣花堂。

雜詩

當時人影記周遮。步履回廊月又斜。一鏡照天仍覆地。眼中何處有蓮華。

危樓

晨炊殘月掛危樓。樹頂朝陽綠尙稠。短短秋風纔領略。困人煩暑又淹留。

梁任公詩選

吳母六十壽記與北山先生盛年游宴及弱男夫人東瀛過從之雅感懷成詩

客中問字憶初筭。耳熟慈徽廿載齊。萬卷果能傳士女。五噫當日重鴻妻。干霄氣概人如接。去國光陰夢欲迷。我爲謝庭徵往事。椒花壽酒喜同攜。

胡漢民展堂詩選

嶺外

嶺外惟看水北流。客塵迢遞到汀洲。山如有意遮前路。雲本無心入早秋。肯向天涯怨行役。且將風景遣離愁。故人千里音書絕。鼓櫂滄江可自由。

組菴先生以臘月生日適協之得其所書詩冊屬題因以爲壽

文采風流是我師。翁錢應悔能未詩。似從長慶參坡老。竟以平原傲米癡。虎臥龍跳非易事。春松秋菊可同時。蒼生不病君無病。爲祝南山無盡期。

歸途

緩緩花開陌上春。卅年人未老風塵。江山信美非吾土。書劍相從有故人。未到炎方猶是雪。偶拈詩筆已如神。尋常不解乘槎意。早與窮搜海外珍。

偕湘翁與陸氏昆弟憩枕江樓

坐對松寥鬢未斑。枕江樓上且憑欄。登臨前代多名士。砥柱中流是好山。人喜鶴銘猶有字。我疑龍隱本無丹。東坡不住君何住。合趁斜陽載酒還。

柬組安

故人消息滯滄洲。魚鴈能來道未修。無限風光愁嘯獨。多時哀樂託清遊。匡廬已過千峯雪。嚴瀨誰知五月裘。尙有豪懷思擊楫。幾人天際望歸舟。

溥泉鐵城兩兄航空來京問疾索詩卽以呈教四疊大仄韻

爲訊新瘥入我樓。一春未見抵三秋。雲龍相逐當年事。風雨不時斯世憂。摘埴索塗人定笑。飛行絕跡子無愁。詩腸酒胆都如舊。白下能爲幾日留。

和協之賞海棠詩

爲怕風姨與雨師。相從花下一徵詩。早疑蜀老吟偏欠。遲奏通明意又癡。鬪豔不妨沉醉後。撩人全在半開時。舊來台榭凝塵處。錦幃橫陳未擬期。

和協之明孝陵觀櫻

鬱鬱崇陵帝與師。尋芳人到獨哦詩。海棠開後櫻花笑。社雨歸來燕子癡。禾黍故宮思往事。葑菲下國采何時。廿年前共瀛洲住。臘屐開樽歲有期。

依韻答鶴翁慕園獨坐見懷

慚愧江南贈一枝。連霄風雨小樓知。故人贈別尙懷我。春事未闌宜有詩。最愛課兒溫舊卷。不曾留

客鬪枯棋。一年一度還家好。羨煞儒官有假期。

題樊樊山詩集

一生低首事南皮。峽蝶驚才語未奇。頗有時名因斷獄。自誇餘事始爲詩。蘇門鬪韻誰偏好。竹垞貪多本不辭。老去風懷漸消歇。猶聞都下唱靈芝。

寄湘兄

憶得蕭山舊日詩。歲寒珍重是天涯。十年南國心如水。匹馬西風鬢未絲。爲客莫於無鴈處。渡江須及有魚時。瀟湘九畹非容易。紉取芬芳且勿辭。

歸舟渡黃海有風浪旋止天日晴好

玉關歸路未蹉跎。浩浩東瀛又一過。歲月已教排積感。風雲猶爲助狂歌。人言海水有時立。我信春光自此多。季子平安勞問訊。去年冠劍近如何。

紀事

何人被髮祭伊川。胡運偏能過百年。日月無光空莫照。太平有道澤誰延。早知康樂非山賊。漫信孫登是水仙。縣令破門前日事。酣歌恆舞卻依然。

寄懷直勉毅生

執編曾以伯爲師。風雨連床未解詩。投筆廿年人漸老。欄柯一局客常癡。不逢鄒衍談天日。幸有長房縮地時。玉蕊檀心芳訊早。好花如友識歸期。靈光巍煥老經師。海上相從共正詩。文字可堪遭黨錮。年光原亦愛吾癡。飽看滄海橫流後。長記鄉園守歲時。卻笑此身閒不得。明朝又赴簿書斯。

大厂序錄集曹諸什再疊樓韻題後

刻意裁爲五鳳樓。更將繁露說春秋。老成謀國尙如許。年少有人同此憂。客去不聞三日宿。詩成且遣一春愁。江湖到處能相忘。枳棘無多未許留。

寄贈玉甫

小園桃李亦同枝。別館春寒意許知。有客正尋游俠傳。羨君猶記少年詩。詞心淮海兩孤本。國手隨州一局棋。便欲移情親絕藝。人間錯向竹林期。

鶴亭分詠小樓花果再疊枝韻賦謝

名園未乞最佳枝。學圃無能亦我知。坐起瞻烏綠愛屋。醉搖屈筆各爲詩。情深不盡花間語。律細如



尋譜上棋。窮巷栖遲車馬少。相依晨夕見交期。

和王廣陵暑熱二律後忽大雨連日不止次前韻寄大菴

六月南方苦無雨。翻盆乍見走兒曹。風能屠熱水皆立。雲但塞空天不高。傷此閭閻何所庇。問誰戶牖忍辭勞。杜陵亦恨蓬蒿長。可慣喧豗到枕濤。

祇愁金氣盛荆陽。三日爲霖過本望。去馬來牛將莫辨。朱炎白谷早生涼。所思行潦誰通信。不遇鈴淋亦斷腸。功罪兩難說真宰。作隄捍水始皇皇。

暑中嬾出

誰令暴日獨飛揚。爍熠當空未可望。七月但占流火熱。幾人曾共舞雩涼。竟無雷雨能蘇氣。最是炎蒸易毒腸。一事不爲猶汗出。終朝對食只旁皇。

暑熱思風

執熱莫如荷戈士。窮年不洗苦其曹。客疑杜老何由嘆。我會淵明所謂高。豈必禽窮能自拔。倘求蟬飽恐徒勞。獨居未作乘桴計。忽復移情海上濤。

精衛獄中誤聞余死有詩三首至粵始出相示依韻和二首

火盡薪仍在。行危道不移。心魂留共守。風雨恨相離。國士生還日。羣黎望治時。當春繁萬木。彌重歲寒枝。

既定共和局。因之揖讓聞。我懷良未已。此日且無紛。回鴈知秋氣。飛鳥有舊羣。徘徊不能去。應爲故山雲。

答山父

舊聞楊伯起。相見更相親。言語妙天下。文章到古人。風塵憐我慣。歌哭問誰因。磨劍飲歸士。詩成芒角新。

晴雪

晴雪幾何日。東風又是春。衡陽無去鴈。珠海有沉鱗。山尙瘦如許。流原清近人。閭閻幸安集。改歲未言貧。

由張家口歸

但見千山白。誰知三月春。樹枯仍入畫。月冷故依人。歸路衣裳薄。迷塗僕豎親。笑他趨熱者。何事候風塵。

自遣詩未盡意復集得五律一首

世尙感橫流。殘夷不易收。武鄉仍討賊。李廣定封侯。士或因時出。人都爲國謀。山居風雨急。好與說離憂。

與精衛同舟無月夜夢有月同醉

殷其故人載。離鄉尙有羣。月明方在水。望遠竟無雲。此景不常遇。清光如爲君。東陽先置酒。相與建殊勳。

集曹碑答協之

魚書從故國。感子意殷殷。集字還相和。修辭若有神。文章本餘事。金石屬才人。無復憂離別。雲山萬里親。

讀唐人說部二首

漢節羈留異域遲。懸知相苦是相思。如何避垢長亭日。不贈當歸贈可離。解衣投地訴君王。百戰餘生亦可傷。無怪旁觀人冷語。從來健者欠思量。

題林琴南畫

一雙燕子愛繁華。不入尋常百姓家。祇是黃昏時候易。舊巢何處暮雲遮。

葉子戲

天人參半客忘形。往復橋行要不停。亦似方圓社中事。西來歲歲說棊經。

山居近日頗有弈事

拌得千輸博一贏。曾聞衆志可成城。關河寸寸傷心地。代與癡兒不用兵。

鶴亭招遊焦山看月當頭余未果行而翼如默君實往歸皆有詩

一生當著幾兩屐。一生幾見當頭月。同是達觀善語言。前者見稱後者細。當年渡江化爲龍。晉宋之後王江東。不見鴉兒鐵騎黑。但聞燕子春燈紅。引杯在手事已足。攬鏡照影人圖儂。漢家三百業中斬。遂令坐罪庸主庸。冒生我友意不然。謂此判案殊未公。天子風流亦何過。無臣先泣明思宗。馬阮老姦實誤國。何況胡運非人功。君不見銅臺未分妓香薄。柏梁爭嚙妃唇穠。孰知沉飲非荒宴。往往不駐咸陽宮。又不見六朝帝子生可憐。五代無賴皆英雄。持彼黜此泥成敗。臧穀之辯如莊蒙。與子試問頭上月。敵屣萬有誰能從。爲此招邀金焦峯。佳節亦有良儔逢。邵家夫婦光與鴻。不知許事追攀窮。待月得雨將毋同。歸來一一歌長風。有屐不蠟吾其慵。

滬輪中寄精衛并別滬上同志

揮手出門去。慷慨雜悲惻。將去行復止。欲吐語仍塞。豈有事萬難。而須喙三尺。阿奴利火攻。同氣重相迫。盡悴不足云。讒言交四國。昨日杜陵翁。城南望城北。天道縱難知。民勞願小息。相去一水間。如之何勿憶。

爲韶重覺書暨南大學致遠堂聯楹再疊前韻

爲君重作書。北顧我心惻。滬濱文化區。幾月兵戈塞。學舍摧夷盡。况此書數尺。寇去仍之他。行成由誘迫。僑民一千萬。強隸憎帝國。失地聞可復。輦金送南北。子弟易成材。吾望終不息。斯堂燬再興。留取後時憶。

種竹

種竹北窗前。瀟瀟清香發。本以招涼風。反教蔽明月。

于右任詩選

太白山記遊歌

巍巍乎太白。高度一萬二千尺。雖與喜馬拉亞諸山難比並兮。亦足傑峙於其側。莽莽數千年。山之

博大英偉。竟未盡宣於冊籍。

高據西北雄且尊。太華少華如兒孫。李白想像詩兩首。東坡趨起駐山門。文人學士終古不敢往。年年朝山而祈靈者。惟有西北困苦之人民。百難自慰來上訴。家家如有太白神。余家距山二百里。山如當門咫尺耳。少小挾書入學時。每欲登峯盡其美。愛唱六月積雪歌。欲往遊之有年矣。

去歲九月歸西京。曾約張邵楊同行。（張溥泉。楊虎城。邵力子。）嗣聞冰雪封其道。太息有志竟不成。臥病申江春復夏。病起西行道關下。張楊相左關門前。邵因墜馬疑作罷。詎知同學（指邵）勇過我。弱者自強能稱霸。曾偕女傑傅與陸。傅爲賢助陸新嫁。（陸爲雷孝實廳長夫人新結婚者。）生物地質約專家。彼此欣然乃命駕。計時已至八一九。鄉人爲語稍傷後。不如明歲趁早來。否則封山恐不久。前途如何俱不計。進雖遲疑怯則否。山陰之路聞有四。毅然選定營頭口。

入山首宿蒿坪寺。胡桃栗樹滿天地。白雲明月自入門。破寺遠收萬山翠。野棉花開草亦妍。山石榴繁川獻媚。櫛葉已少詩人璣。夜深重讀雪木記。（李雪木爲山下人。有櫛葉集。）

二日抵大殿。菩薩山之首。首五臺山。峯峯妙無偶。雖低太白高岳鎮。捍衛山門功不朽。三日向陽寺中待。一路奇觀現雲海。上是青天下白雲。人居中間行自在。數百里中鋪一色。如脂如綿變成彩。

又如遠海不盡之波濤。大起大伏彌覆載。羣峯露尖似魚龍。吞吐出沒無主宰。材木巒柏樺漆竹。山行漸高樹漸改。蒼蒼萬幹落葉松。亂石爭地生重重。枇杷大葉又小葉。銀背金背爲大宗。杜鵑如柴滿碧岑。芍藥開落自古今。名花滿地僧鞋菊。異草宜人俄掌蓼。

四日路經文公廟。向天掀髯發一笑。一封朝奏天下驚。夕貶朝陽年已老。雲橫秦嶺家未知。骨委瘴江國難報。念此淒然深下拜。烈烈罡風天爲怪。似謂來者爾何人。人生應不計成敗。民族國家危復危。無補時艱敢自懈。精誠所感金石開。默默而亡有明戒。

喬木到此已不生。火成岩裂路無情。十二重樓時隱見。巨石懸空勢欲傾。皓然玉聳出雲表。參差險怪無由名。或似老扶少。或似弟讓兄。或似戰士曳甲走。或似農夫負耒耕。立者坐者似流飲。臥者倚者如据枰。又似獵者弔弓射。更似漁者垂釣妨其驚。偶翻古典引神話。乃是西方耿耿之金精。

忽然路轉復雲起。大太白海在眼底。萬朵祥雲迎我來。淨水童子應時至。風雲變換萬千端。高下樓閣湧目前。地極高寒天又雨。中宵衣冷再添棉。山中有草雜百藥。採藥人來歲如約。風呼崑崑雨洒洒。道士敬謹先囑託。不然雷雨立刻至。神總不怪鬼作惡。

二太白海無眞面。神帳子中露一半。(道士呼霧曰神帳子)三太白海如玉。人山作翠屏形圍

扇。或謂神爲堯舜禹。下憫生民司雷電。玉皇池大佛池小。一再請來平世亂。十里五里難盡游。地老天荒吾亦倦。三海兩池如子母。惑占數畝數十畝。一分潤到人間。各成河流其利久。絕頂飄渺八仙台。台下平原廣漠闊。下視人間當一慨。雲霧阻我真奇哉。芬君草木白君石。（芬爲芬次爾。白爲白超然。）各攜纍纍下山來。所恨冰川尋未得。（有謂山上有冰川者。此行僅見大太白海旁一處似之。）引爲憾事人空回。

下山之難等上山。淒風苦雨遍人間。危途幾經鷄上架。（鷄上架。山上險處地名。）平路還憂石守關。（由菩薩山入太白之關。有巨石。）神仙橋前望。復望駱駝樹下彎又彎。（地名駱駝樹）山中不見綠髮翁。豈有仙人去不還。

全山未知多少寺。十寺道士僅三四。山外凶荒山裏飢。農村破後難留置。無寺不破破難修。哀哀道士尙祈字。（道士祈書。予大書風調雨順國泰民安八字贈之。）風調雨順神何如。國泰民安或待子。勞人欲了公家事。太白山頭讀道書。

王陸一詩選

二十二年十二月與溥泉星樵雄夫先生奉使粵桂舟次南海



一舶東南水作塵。萬方多難幾行人。天平海岸無疆堠。風勁晨空望歲春。誰假兵符移列郡。羣於元輅寶椎輪。魚龍靈聽還山立。凝告憂皇國步迤。

遊番禺羅岡峒

萬頃寒香散縞衣。天南何處不忘歸。祠神樂靜谿山碧。丹橘垂垂嶺四圍。長水高山撫舊題。(山亭有港若水題山高水長四字)遺民多半入山栖。梅花誰種人間世。一髮中原望眼迷。

珠江江舟遣意

脈脈珠江水有情。雲低一片遠航輕。青青兩岸榕陰合。時有濃歌約隊行。

蒼梧夜泊

水落蒼梧帝女祠。皇皇虞舜亦何之。當時有念私天下。誰則家無不肖兒。

過廣西貴縣石達開故里得石氏先塋被掘後殘碑又土人言城西北天平山下鑛工隨太平

軍掘隧道轟城事爲長歌以紀之

粵西之山峯地起。粵西之民反天子。金田一幟動胡天。長白連山靈氣死。鑛工萬數掘天平。驅穴名城盡圯。困頓農夫不得耕。去打江山爲種籽。髮散紅袍萬陣來。太平開國虜廷哀。花縣貴縣去咫

尺。一時霹靂生人才。士夫奴性大一統。尊王變夏鋤其種。洪王獨用西方法。不辨太牢祠孔某。儒冠自古供溲溺。有時亦利僭隴畝。南京不開鴻博科。遂有鄉紳練鄉勇。天塹不渡人將渡。中原亂者正無數。分兵諸道下幽燕。何至諸王爭五步。此時田者浩將歸。地主豪家有腹誹。固是衣冠還故國。無從號令出重圍。鍾山一幟翼王走。侍王英王爲愈微。甜露日歟民亦盡。蜀道崎嶇胡可爲。天下大勢皆爲天。屠南京者功巍巍。一朝聲裂空城在。湘水洋洋淮水肥。至今父老傳說苦。斷碑剩字墳無主。先人爲戮事不成。弓劍橋陵哭皇祖。赤手元元傳好句。石頗天驚醜羣虜。今來瞻弔禮原野。眼底茫茫事何補。我聞西川有杜鵑。猶爲翼王啼風雨。

過容縣勾漏洞

葛洪求丹砂。乃以兵解去。養生失肩背。十指無乃巨。狼疾古所嗤。况生亂離際。事貴竭心力。無爲多避忌。哀哀世已窮。倏忽年命遽。艱難赴應殫。念以忠貞繼。振衣陟重岡。山川望不異。巉巖石怒出。危微時戒懼。山洞初窅冥。垂巖若爲厲。深邃竟莫測。云此真逸憩。處茲轉平平。人世失詭戲。山榕多苦辛。根枝下無地。停車一嘆往。雲過垂天翼。

汪兆銘精衛詩選

重九日集掃葉樓分韻得有字

飄風吹落葉。散作沙石走。擁簞非不勤。積地條已厚。仰觀高林杪。柯條漸堅瘦。危巢失所蔽。岌岌不可久。宿鳥暮來歸。棲託已非舊。踟躕集空枝。婉孌終相守。此時登樓者。太息各搔首。西風日以厲。勢欲摧萬有。何以謝歲寒。臨難義不苟。蒲柳奮登先。松柏恥彫後。敢辭晚節苦。直恐初心負。高人緬半千。佳節遇重九。還當掃落葉。共煮一尊酒。

譚延闓組詩選

挈齋來出示書扇漫題并寄邠齋

別後懸知鬢雪侵。閉門惟見屋廬深。久聞讓草多新樹。更喜桐枝近結陰。畫餅舊嘲名士氣。脂車今見故人心。年來我亦成匏落。便擬弭弦且自禁。

哭子武

一別眞投筆。三年只枕戈。有書長不達。無命欲如何。生死交情見。孤寒涕淚多。裹尸餘馬革。悽惻向江沱。

辛苦依人計。艱難烈士風。前知悲郭璞。從事異臧洪。未必謀生拙。獨憐殉友忠。縱橫湖海氣。今日盡

途窮。

少年曾並轡。中道各揚鑣。鷹隼飛常厲。騅駟意苦驕。多才成負負。同好已寥寥。白首誰相慰。羈魂不可招。

夙昔誰知己。平生誤感恩。室惟瓶粟在。篋有謗書存。意志兼儒俠。恩情託夢魂。冤親同一盡。痛哭更何言。

邵元冲翼如詩選

癸酉九日集掃葉樓分韻得吾字

淵明昔避世。栗里遂清娛。榮鞠制頽齡。春醪義繩樞。矯矯柴丈人。掃葉荒城隅。一樓容野逸。半畝足潛夫。兩賢接千載。迹睽理莫殊。肥遯見貞亮。清風厲頑愚。寂寞三百年。高會追前模。連鑣集俊彥。照座皆驪珠。北辰共衆星。南州會諸儒。芬華曠異代。文采動三吳。極目大江流。寒暉映菰蒲。時艱思無逸。敢云茅可誅。發軔陟峻阪。振轡歷修途。抗志陵歲寒。郭素葆真吾。

謝无量詩選

郊居雜詩

人烟東郭外。花草小園中。歲歲開還落。紛紛白間紅。不遷徵物性。有待惜天工。何必羲皇上。清歌萬古同。

不測是陰陽。都無卻暑方。微風諸樹響。獨夜衆星光。循髮知生累。棲神學坐忘。自私還自笑。偏乞此身涼。

重九集掃葉樓分韻得覓字

緒風促凋年。奇懷振佳節。發踐古猶今。春容心共跡。頗欣耆彥臻。未訝庭坻溢。逸興邁臨河。希音齊舍瑟。昔聞隱居人。避秦於此宅。舊術雖已蕪。遺芳如可摘。身名有終盡。萬事雜落葉。獨茲山水情。無喪亦無得。所以超世徒。不同聖者惑。左右旣周眺。高卑還恣歷。遠目會有窮。前塵邈難覓。歸路貫畦阡。吾將從沮溺。

陳樹人詩選

重九日集掃葉樓分韻得始字

谷楓葉丹漸。籬菊花黃始。佳節又重陽。歲序驚若駛。萬方正多難。登臨仍戾此。座上列羣賢。惘惘情難已。蕭條落木風。浩淼長江水。攬轡更何人。澄清酬夙志。

陳小蝶詩選

與吳湖帆論畫

烟雲迴合萬峯安。鱗墨如鯨點漆難。一種虛靈渾厚極。始知真是米家山。襄陽虎兒住京口。變盡烟雲北固山。不信世傳高敬彥。但能墨戲在人間。螺青炙墨千層雨。淺絳烘開萬夕陽。董巨以來齊斂手。獨留此法與黃王。親見雲林十萬圖。荆關法乳未模糊。如何近日荒寒境。寫得江南墨也無。太倉三老豈偏安。寥落當時位置難。袖底一拳黃子久。水邊林角盡嚴灘。白石中峯一柱擎。兩朝開絕董華亭。豈知門下成凡鈍。獨許婁東王茂京。撐胸萬卷詩書氣。天際真人想像存。若以仇唐比王惲。南田猶是謫仙人。塔墓山僧吳仲圭。淋漓仙去未曾歸。晴窗展卷文衡老。鼠毛年年負麝臙。二石流風及老瞿。崩雲裂石總驚渠。百年絢縵歸平澹。側筆新安學懶迂。我有忠言一質之。人人董巨是吾師。劇憐半幅江南景。行旅蕭條若個知。米老已爲無李論。人間工款盡營邱。聰明唯有王烏目。獨向南州借宿求。袖中萬派歸宗手。國器完成璞已差。一代丹青爲君盡。更無餘地位乾嘉。雍乾以後無餘子。直墮風流二百年。湯戴奚黃滕薛老。將何人物繼前賢。

柯邵忞鳳孫詩選

詠史

昨夜瓊槍慧紫宮。九門投鑰劇匆匆。銅駝陌上聞傳角。玉女窗前見倚弓。野散周廬屯貫市。天回輦路出居庸。傷心一掬昆明水。落葉哀蟬恨不窮。

潼關北去走京華。撮笠都人盡憶家。秋色初辭溫室樹。春風又落上林花。珠盤玉敦終修好。旅矢彤弓已拜嘉。老病儒生揮涕淚。不隨戰士化蟲沙。

莫向胡僧問劫灰。旃檀一炬化烟埃。城邊地裂雙鵝出。海上風多六鷁回。左道黃巾成底事。清流白馬亦堪哀。當年只有萇宏血。濺作東華井底苔。

再入史館簡惲薇孫學士

撮笠猶瞻舊國容。官曹僕儻獲相從。波濤有筆慚良史。耒耜無田用老農。欹枕晚風鳴敗簾。卷簾新月挂疏松。飽諳世事成滋味。苦憶梁鴻廡下春。

詠史

質家統系繼兄終。一代蒸蒸孝治隆。鳧鴈未翔銀海上。熊羆猶護翠微中。荒唐泗水甯淪鼎。寂寞橋山尙瘞弓。復土將軍如昨日。園林蕭颯起秋風。

抵陝州聞車駕西幸已至長安

迤邐山城帶迴樓。紅旗捲雪朔風遒。地分二陝桃林隘。水迸三門竹箭流。望氣應知行在所。論都早建帝王州。潼關近得平安報。父老迎鑾涕淚收。

唐明宗祠

十載中原儉德臨。朱邪終覺負恩深。一盂麥飯無人奠。社酒鷄豚父老心。

王熊

將軍軒臥洛陽城。白梃能驅十萬兵。一任焦梨來齧索。老熊空與貉相爭。

韋孝寬

玉壁威名天下聞。晚年又策相州勛。關西男子籠東甚。也佐楊家盜宇文。

詠史

搗戈遽挽日西傾。社稷安危仗老成。不信書生能誤國。功名造次語書生。車聲過闕日磷磷。竟說旄頭彗紫宸。沾洒縱無嵇紹血。虎門端委又何人。

題徐總統畫垂釣冊子



鑄笠簑衣一釣竿。白蘋洲渚寫荒寒。不知漁父住何處。七十二沽煙水寬。

釣魚城行

釣魚城。乃在涪水濱。元兵三十萬。不及李夫人。夫人有兩兄。南朝王統制。蒙古李平章。統制問夫人。答言妾姓王。願作將軍妹。恩義甚非常。時在嘉定末。蒙哥冠東川。統制守合州。苦戰二三年。人言涪水絕。城內汲神淵。何以示北軍。餽之鯉魚重兼斤。爾可烹魚飲美酒。十年按甲吾能守。砲風中人如中矢。釣魚城下蒙哥死。遺命得合州。鷄犬慎勿留。可憐一城人。魚在釜中游。臨安已款宋。已平獨有合州不解兵。夫人謂統制。妾本李家女。有兄在成都。呼來能救汝。朝封一紙書。暮製一雙履。持書復得履。平章悲且喜。奉詔至合州。降者皆免死。統制不受官。仍除招撫使。至今合州人。能言合州事。前有冉家兩兄弟。後有夫人奇女子。

阿文成公

高宗神武燁旁魄。翦滅強梁朝萬國。紫光閣上第一人。自入金川名赫赫。臨機料敵兼忠智。萬里歸來獻俘馘。英雄嚙踏聽指蹤。權倖恣且畏顏色。天彭井絡昔所臨。崇祠軼轍成都陌。百餘年中事反復。猾夷狙伺通琛帛。曲突之謀適不用。爛額焦頭俱上客。邇來國是誰敢搖。宰相相依遠能塞責。披雲

激電想公來。後生願問平邊策。

井陘

險絕井陘路。崐巖自昔聞。星辰疑倒入。土石劃中分。寂寞陳餘壘。悲涼廣武君。甯知千載後。嶺上祀將軍。

車遙遙送別長兄

車遙遙。如蓬捲。心搖搖。如輪轉。車有兩輪恨不方。行人莫恨關山長。車遙遙。如雲行。行萬里。轍有程。山長水遠俱能越。莫恨車輪恨車轍。

江伯瑟詩選

宜城道中

船頭日色明還晦。雨後江流直又斜。生世萬般疑雪浪。當春百變只烟花。微哦燈火成孤注。急劫鄉關倚亂笳。莫羨躬耕守芳屋。荷戈今日遍田家。

牆隅挑株幾日未見着花且落感賦長句

未必窺園礙下幃。餘寒只道靳芳菲。毋何破寂連連好。已是投閑脈脈飛。避地不妨春自笑。成蹊除

待實能肥。飄紅孕綠年時事。猶有墻烏戀落暉。

徐貞惠先生挽詞

一盞寒泉松菊冷。百年喬木雪霜深。易名贖祀方衰社。支枕猶留未了吟。豈有駒光供斂手。只應鴻澤欠勞心。踐踪禹墨兼箕穎。碑德何人感不禁。

寄張湯銘

一日爲留不我應。衝寒去舸浪千層。沉酣此世還同夢。艱苦如君已塞能。客子先陰天際鴈。故人情思雨中燈。寄書許在還家後。百里焦湖渡未曾。

次韻丁洽明丈戊辰除夕

不逢杜老飛揚句。誰顧王郎抑塞歌。春色只從殘燭起。梅花已作去年過。萬緣新舊安塵夢。一念田廬感歲和。永夜沉沉星斗換。關心庭燎奈明何。

南康縣長張治東殉匪難之期年其介弟庚由君開追悼會于金陵因賦

時平人競論官守。寇至還爭避劍芒。獨惜盛年爲玉碎。居然文吏共城亡。鴿原收骨從誰問。蟲劫勞生剩永傷。盡室天涯望笙鶴。故山寥寂漫歸翔。

秋至

酷暑亦已暫。當時與晝長。亂蟬爭日影。獨燕語秋光。病客餘朝臥。層樓得夜涼。飄蓬隨節物。何用計行藏。

江絜生詩選

重別陸一三兄之宣城

每到褰裳省百憂。冶城風物逼蕭秋。雛花應候紅原早。急雨添波綠未柔。去國春心驚曉鳩。渡江絲鬢影危樓。鍾山夙有留人勝。辛苦青衫滯石頭。

夜泊巢邑

荒村寤我以寒鉦。坐惜深波燭影清。遙夜詩情雲共遠。十年心事月空明。濱橋漁火愁邊影。壓水霜機夢裏聲。倦倚舵樓如中酒。從軍書劍怯長征。

落花

擾擾枝頭幾日芳。久懸詩筆爲迴腸。不驚夢裏鶉聲急。但覺尊前蝶意忙。生事隔年應不減。閒愁何意苦相將。綠章爭與留春住。暫乞朝來半面粧。

旋舞高樓委碧池。出塵心事與遙期。殘英欲化風休卷。好月還留夜應遲。愁裏江山新濺淚。人間色相恨傳詩。重臺回首幽明判。寂寂春心獨付誰。

雨花臺題壁

江湖歸淚酒新琴。更倚邊愁望虜氛。雪近寒鴻初欲逝。臺空烈士竟無聞。諸公並具匡時策。獨客閒看渡嶺雲。一樣傷春又傷別。不關刻意學司勳。

喪罷哭祖慈兼呈大人

骨肉誰教慟永離。重圍索笑更難期。何曾一滴穿抔土。枉負深恩塞兩儀。清道能祈天暫淚。叫棺真憾鬼無知。餘生父子須同守。廬墓旁耕殆不移。

按此詩字字瀝白血性。余同無祖母。讀之淚涔涔下矣。君寒附識。

滬甯車中呈志先

煩憂不能寐。行程欲何許。對視車中人。醉夢混生死。甯滬月往返。動息每千里。山川與林木。歷久漸成記。山靈豈有意。當春漫桃李。昔人恣行樂。秉燭意難恃。哀我青鬢絲。蓬蓬濯風雨。百憂夕來日。不去定何取。耀野燈不繁。壓牖山無語。生涯喻鴻雪。聊復賺吾子。

答傅中弟來書代柬

一面勝百書。涪翁理早闌。傳中寶此意。千里來開關。曲衣命晨駕。信宿還滬邊。一歡竟何謂。所得誠  
悽嘆。疾發不可治。書來告其原。累累字盈紙。憂患如叢山。謀國貴者事。何預窮與酸。子書入我目。我  
目淚長乾。三兄答子書。(謂王陸一)理事窮追探。連宵語燭下。含意深無端。時艱至此極。爾我淪  
其間。誰爲策進退。哀哉終何言。

奉懷王陸一三兄宜城君時就聘安徽大學文學院長

石城艇底春潮咽。憶聽玲瓏黯然曲。曲裏風波足苦辛。沾夢楊絲煥愁色。鍾山倚劍曾幾年。畫城流  
瓦騰驚烟。夢壓青冥不可轉。醒來對臥寒江邊。此際君方苦縱酒。往事霑裳怯回首。醉裏江山喚不  
應。餘生幾託蛾眉手。穿簾碧逕萋蒲柏。(時與君同寓上海蒲柏路)踏歌汝我憐芳節。入世留名  
計已疏。人生得意唯行樂。不逢知己長坎坷。殘軀得所復何惜。旗亭貰酒趁斜陽。魂魄千年更相覓。  
豈有王孫愁一飽。避秦自愛龍山好。烟波朝下武陵船。寒空亂颭離羣鳥。况我淪棄叢憂患。此別使  
我摧心肝。從知離合亦有數。眼前但覺愁漫漫。陽春二月芳意鬧。含凄尋覓江之灣。送君雪後記行  
跡。鴨尾忽漲新波瀾。感此躊躇不能去。浮生誰盡交游意。宜城新雨酒船香。一夜東風踏波至。

李家煌駿孫詩選

日本海嘯地震火發毀東京橫濱大半災廣三萬餘里死傷百萬人亘古奇劫披圖感嘆成詩  
奮碎微塵三萬里。剝幡心動尺圖中。桑田又屈麻姑指。火聚難回黑業風。逐客去秦初自詫。  
（先一月我僑工被逐歸國者千人因免於難）遷京懸讖若爲功。  
（先是有日本某教授預告遷都）危  
闌咫尺關情處。一樹櫻雲挂日紅。  
修羅宮倒波旬泣。地水火風彈指中。藕遁難逃天帝譴。陸沉虛擁甲兵雄。幻師術就終成劫。  
妙語機先冥若通。畢竟山河無寸土。道人定起咒香紅。

夢子淵

詩魂結素襟。遠夢肯相尋。冥對終無語。淒然共此心。春暉傷寸碧。海月奠幽吟。  
好去依親側。倚閭老淚深。

自施口陸行九十里入城

山河春更至。換世我初歸。望望城如故。堂堂事已非。鄰童喧客過。梁燕逐人飛。  
腸斷王孫草。迷天弄夕暉。

次舅氏原韻奉和

野水菱蘆窟。茅庵得小橋。霜鐘怡獨往。曉詠暖秋朝。狎鳥得溫佛。穿溪便語樵。幽尋多勝獲。妙句證詩瓢。

歸里

故山渾無恙。一見點吟頭。揮手十年別。填胸隔世愁。鄉聲逼遙夜。歸夢滯荒洲。瘡裂驚弓鴈。那堪更鼓桴。

九日登黃浦灘匯中酒樓

短酌取酒意。快登江上樓。浪高風不定。天遠樹疑浮。哀唳來遙鴈。奇懷激怒流。年年此重九。笳角總悲秋。

早起澆菊忽覩籬間海棠盛開口占絕句

顛倒人間失主張。倉皇天亦亂暄涼。小園十月誇春事。一夜繁霜破海棠。

陳三立散原詩選

題新豔秋釵弁合影圖



本來面目別釵冠。阿堵傳神勝筆端。明鏡好從三面照。秋花化作兩枝看。回波爾汝相忘慣。傍地雄雌欲辨難。絕似蓬萊生月頂。同光分影出飛鸞。

省墓

短松過膝草如眉。綿麗川原到眼悲。叢棘衝風跳乳雉。香花搖雨濕蟠螭。歲時僅及江南返。禍亂終防地下知。弱妹勞家今又盡。茫茫獨立墓門碑。

汪榮寶哀父詩選

次陳漢園韻

滄海鴟夷未許逃。鳳城春色正如潮。芳林試策愁塵上。曲水憑闌怯酒消。大廈故難資一木。輕陰先與護初條。舞雩初服都無改。風詠惟當共此朝。

和黃黎雍丙寅除夕

客裏流光盡可憐。偶逢殘臘重凄然。風飄泉冽知何世。天動星回復此年。半畝荒園容小住。一庭積雪照無眠。朝來試和陽春詠。極目飛鴻到朔邊。

陳衍石遺詩選

翼如鶴亭。鑲蘅秋岳。諸君約往。白下登高。余初回吳門。懶復出游。就近赴費仲深虎邱之招。以四十字謝翼如諸君。

堅約登高去。清涼掃葉樓。病來剛制酒。懶復續前遊。虎阜千人石。山塘七里舟。長房從續地。報向致書郵。

重九前一日仲深招往虎邱登高歸舟過半塘觀元僧善繼血書華嚴經

重九前一日。招我上高邱。有似清明節。先爲寒食遊。免逢空街鬧。小駐半塘舟。爲謝金陵客。難登掃葉樓。

朱古薇畫邨詩選

贈李梅庵

骨折心摧淚亦乾。世人祇作等閒看。猶聞下筆風雷起。便與臨觴醒醉難。着想何人到青史。收身百計遜黃冠。尋仙采藥誠非妄。期汝行吟剏大還。

次韻答王病山

極天兵火况修途。誰謂萍蓬非定居。用意故須憂患外。告哀猶是亂離初。新知濡啣宜樽酒。舊頌流

傳尙井廬。日夕雙江急東下。莫因人事損音書。

姚華重光詩選

題蓮花庵圖

前聞謹憶藤陰記。門徑極佳似舊庵。別院百年荒已甚。幽棲一榻臥仍堪。著書今日玉屏後。成咏昔人接葉難。回首來時新種樹。倚天松柏欲相參。

又疊前韻懷段懋堂先生

金壇人往空遺跡。瑟瑟薜蘿此故庵。三月選官春未遠。百年問字晚猶堪。思穿鄰壁通香火。若話薪傳共湖南。才盡江郎能察篆。後來匡謬亦曾參。

黃侃季剛詩選

金陵不懷古效霜紅龕

北阜曾聞鬼受封。南塘且喜盜皆容。石雖無恥叨三品。闕旣難成借兩峯。堪笑湖名同燕雀。可能山勢比廬龍。黃旗紫氣功安在。明鏡冰花識自凶。

贈大圓居士

都梁奇卉遠傳芬。矯矯唐生信不羣。辯理直過齊物論。歸真早有發心文。螺音應揭狂禪覆。鴈宕今看晏坐雲。我已人間無所戀。憺回江海擬從君。

始達武昌卽事言懷

十載飄蓬始得歸。眼前百態與懷違。故鄉多少傷心地。試問當年丁令威。篝火叢祠楚始張。八年歲月去堂堂。羸顛劉蹶休堪問。且夢人間建德鄉。回首風塵合息機。遠游何事久忘歸。歸來百計皆須後。且向秋山看落輝。隴漢逡巡馬季長。晚途折節亦堪傷。君看繞指柔何甚。猶是當時百練剛。

至武昌寄北京大學文科同學

深淵有回瀾。嘉卉向故根。宿心旣云慰。萬事何足論。馳車武陽外。日夕歸修門。江漢自安流。南紀今彌尊。追維勘亂功。始信危能存。雖幸楚風遠。猶憐秦俗昏。微軀感萍蓬。累歲懷蘭蓀。鄉黨不見遺。承命載欣奔。早憐朔野寒。晚愛江鄉溫。誓將息紛華。專志馨夔殮。登樓望薊丘。慷慨懷舊恩。談讌且軫念。况乃托弟昆。久要貴不忘。薄終義弗敦。徒恐燕雀輩。昂首譏翔鷗。離別誠獨難。思之尙銷魂。

王國維靜安詩選

題梅花畫箋

夢中恐怖諸天墜。眼底塵埃百斛強。苦憶羅浮山下徑。萬梅花裏一胡牀。

嘲杜鵑

去國十年萬事非。蜀山回首夢依稀。自家願作他鄉客。猶自朝朝勸客歸。

秦樹聲嘶 詩選

題扇錄丁巳舊作

烏咽中流水不流。知君清坐不勝愁。魯戈過眼空三舍。宋鐵傷心盡六州。自古武夫避黃髮。於今吾道屬蒼頭。人間會有蟾蜍壽。書劍臨風涕未收。

江亭禊集分韻得妓字

天塲屠乖龍。荒亭曖元已。誰與舞東風。零落柘枝妓。

冒廣生鶴亭詩選

慕園獨坐懷展堂先生

一春到處有繁枝。百念難忘是故知。往昔忙中能見記。別來病起可無詩。諸君祿厚誰饋藥。嬌女日

長應罷棋。上冢過家吾事了。徐行只爲牡丹期。

贈木蘭

到此真逾骨肉親。而翁風義世無鄰。未嘗龍眼猶留我。只覺豬肝太累人。後約定然煩地主。諸雛差各慰天倫。皇乾朗朗終開鑑。絕徼荒山兩苦辛。

曾學孔小魯詩選

掃葉樓秋禊分得興字

六代江山管廢興。危樓歷劫尙峻嶒。日斜楓落紅於染。雨後谿回碧可罾。餐菊光陰消過客。誅茆掌故間殘僧。遊人總說棲霞好。待展重陽更一登。

十刹海襖集分韻得駕字

排日孕沉陰。羣葩報開乍。言循會稽例。共稅城西駕。盛事接江亭。俊遊追水榭。長虹碧鷲橫。老樹蒼虬化。歸鴉薄暮急。反照深林射。湔蘭足嬉春。沉李懷消夏。賓主集東南。襟抱契陶謝。靈光一殿尊。佳辰萬金價。放歌聊自娛。縱酒甯辭賁。相約賞芙蕖。一盞醉花下。

陳詩子言詩選

九日清涼山雅集分韻得如字

八一詩翁爲上客。聯翩裙屐盡相如。雨花臺畔應攜石。掃葉樓頭共飽蔬。心地清涼山色好。鄉關迢遞酒杯疏。開雲一片匡廬去。癸酉登高合大書。

甲戌仲春奉和仲素女士青島詠雪之作

貞疾初痊藻思飛。中郎有女纂遺詞。能栖寒碧山莊境。自譜陽春白雪詞。

陳寶琛跋廬詩選

李園登高

商飈又拂鬢蓬來。林薄蕭寥起百哀。異地得朋聊可樂。殘年能賦本非才。中原鼎沸民誰主。曠野絃歌俗且猜。有弟故山方佇立。烽烟南望首頻回。

挽曾剛甫

介立丁邪世。哀歌得雅音。百罹社老至。一病與貧深。詩學無此選。楹書誰可任。聞喪稽臨哭。衰疾涕爾襟。

段祺瑞芝泉詩選

和太夷

綱紀陵夷那有官。隨緣善導事奚難。堂皇四大猶非我。鍛鍊三冬不計寒。濟世先憂弘聖道。普天揚  
化息爭端。耕莘十就茫茫裏。一相成湯敢仰看。

覺迷吟

方便己之德。損人種因惡。餘慶由善積。惡小不可作。任重名不立。仰媿而俯作。回頭百年身。終天徒  
惋愕。自身無修爲。祖蔭固已薄。每見大劫成。貴賤填溝壑。魔威難嚮邇。芸芸任苛虐。因因而果果。循  
環相結絡。報應權子母。造物司信約。甚至墮三塗。罪業難臆度。旁生蠢然物。箠楚嚴束縛。食肉寢其  
皮。宰割烹鼎鑊。餓鬼喉不開。飢火中焦灼。地獄無曙光。萬年暗摸索。稍存仁人心。作鬼亦自若。覺寤  
夢精進。跬步是極樂。

吳鼎昌達詩選

清涼山重九盛集纒蘅代拈華字促同作

誰在東籬採菊花。遊山冠蓋滿京華。雲亭巖館催開宴。東閣西曹早放衙。更有餘情懷鄭老。遠分秋  
色到陶家。風前我亦頻吹帽。總爲詩人罩碧紗。



疊韻再酬饒蕪

輸君亂世主詩盟。寫盡滄桑好句成。人過新亭襟有淚。客回易水筑無聲。黯然王氣今何在。見慣司空已不驚。飛去遼東城上鶴。歸來猶作舊時鳴。

梁敬錚和鈞詩選

雙括行有序

雙括行爲故司寇林公宗孟作也。司寇以議郎入樞席。輒掌政要。嘗於雪池寓中。栽雙括自榜其廬。乙丑十月。京中政變。亟。樞府要人白晝被劫入軍獄者相繼。其罪跡莫由明也。時公祭酒國憲。欲引疾去。奉天軍長郭松齡者。方回軍指瀋陽。雅重公名。安車專迓。情意迫切。至於再三。公卒爲所動。乃不是月望日夜半行。師過錦州白旗堡。每戰輒克。去瀋陽僅二站。爲日兵所扼。不得達。遂以間騎趨小蘇家屯。忽爲黑龍江軍所敗。郭旣被執。公亦葬亂軍中。其僕王明殉焉。時十一月九日也。逾月。從公行者遁歸。其家人始得實其遇害狀。余旣以丙寅元旦。偕公弟天民至大連歸其骨。因長歌哀之。

黃沙遮地白日黑。熾火無溫羣動匿。夜半城西忽相語。樓頭雙括聲聲急。急聲淒怨走神鬼。四野沉

愁鮫雨泣。自言生植不計年。南郭移栽傍前宅。剪伐未遭世斧斤。灌畚親承主恩澤。主人才高好儀宇。手抱美人意龍虎。常揮寸筆破千軍。每挹雄談傾衆吐。典章文物出袖襟。將相侯王斥簿鹵。此時吾括亦有神。怒幹虬枝處處春。乳燕疑巢嬌弄舌。玉驄繫汗細吹唇。涵收霜氣化白練。深宵燄燿落星辰。東南動地驚鼙鼓。金吾夜禁遲歌舞。急詔難催細柳營。蔓抄欲獵上林圃。朝衣鐵索鎖郎當。七貴三公賤如土。可憐溫室事難言。脈脈心頭寄鷄樹。關外忽傳佛胼使。蠟封急足走千里。回戈本爲民罷瘼。讓政誓從公鞭弭。巾車羽幣日數馳。公今不出蒼生死。主人對客初沉吟。中夜推几忽長吁。自古陪臣叛大夫。春秋義戰今有無。男兒得意黃龍屠。苟紆民力皆吾徒。短衣縛袴夜轅門。刁斗無聲月色昏。萬騎垂看易漢幟。二嶠遺恨失蘇屯。嗚呼擲憤氣如吼。天心未厭吾何有。免胄不歸先軫元。結纓猶識仲由守。荒村火燒天欲赤。絕世才華血凝碧。淺冢原頭野祭塊。深閨夢裏未歸客。鎖廳秋冷射堂虛。斜巷蒼涼蒿滿目。雲樹不堪掛紙錢。霜濤只當陪家哭。嗚呼坎壇由來爲盛名。百年樹人十年木。樹猶如此人奈何。忠義獨憶王家僕。一夕枝頭無限哀。明朝新主買新屋。

呂美蓀女史詩選

讀八指頭陀集愛其從軍行因和三首

當年二十好身手。欲博邊功奮孤走。小病何日見邊功。開沙磧下堆肢首。烏鴉啄時肌肉變。身死金瘡不敢怨。壁上赤幟拔漢幟。鄉魂迷失還鄉縣。千山萬山鄉縣還。凌煙閣上初塗顏。功臣含笑殤魂泣。世世莫出邊塞關。

夜讀宋九僧詩

不寐垂書幌。非因護夕寒。牀隅燦燦燦。衿上意漫漫。月魄墮天末。僧詩誦夜闌。海潮音復起。起聽倚庭欄。

陣雨

陣雨從東來。庭柯皆潤浥。翠葉垂流澌。明珠墜其粒。

宿霽

宿霽臨高臺。光景朝若沐。元氣一何氣。浮陽下叢木。

楊圻雲史詩選

奉知美蓀春雪詩并道近狀

昔有詩天子。今看女布衣。高齋對清雪。芳木帶餘輝。相憶渺天末。朗吟寒翠微。靜言見殊致。隱德敢

輕幾。

莽莽鶯花氣。幽幽山海春。况當兵馬裏。踽躅遠游人。嬾病忘新歷。羈栖似逐臣。齊烟綠不盡。輸爾及芳辰。

邵瑞彭次公詩選

李園秋楔

鴈聲依舊逐愁來。破舌曾無窈窕哀。敢與霜華論晚節。怕將紗帽限詩才。殊鄉風物猶堪念。明日晴陰那易猜。何處登臨是吾土。樓台滿眼首空回。乞與烟波洗眼來。秋心遙托玉龍哀。荒園竹柏無塵夢。亂世漁樵有霸才。地僻儘容黃鶴下。身閒端付白鷗猜。日斜漸見圓蟾出。爲念清光不忍回。

和饒蘅今傳是樓雅集之作

鏡中華髮逐愁生。夢裏題鵲滿鳳城。羞向矛頭求活計。欲從針孔避詩名。入槃雹災寒蕪味。射眼機槍夜有聲。桑落相尋甯仗酒。覺來一宿已忘情。

諸上真壯詩選

歸視王庵竹樹無恙賦示家人

投老終爲捨宅期。論禪勝作到家詩。禽依庭竹猶將子。蠶待園桑始有絲。東去逝川嗟日月。北征隨地見旌旗。抽身未是安心法。早悔西塍閉戶遲。

立春日挈兒女看梅

便持寒臘作芳辰。湖嶼巾車碾陌塵。家食得閒翻厭寂。寺梅來看恰先春。兒如奔犢爭翁健。塢入青芝覺徑新。豈待南枝得消息。填胸生意爲輪囷。

巖修範孫詩選

次張君玉裁感懷詩韻

陌上花開緩緩歸。眼前濁酒待君揮。法宮今日無誅賞。惇史他年有是非。寂寂村墟鷄犬盡。縱橫城社鼠狐肥。斯須未遣驚魂定。聞說南疆又合圍。

再疊前韻

妖星起滅徧神州。炊浙家家邇劍矛。垂死鹿猶天下逐。將烹魚尙釜中游。等閒輦路生秋草。見慣降幡出石頭。絕口不應談世事。屠蘇一酌散千憂。

揖公贈詩久欲奉答。因鞭韻畏難。是以遲遲。今賦一律。遂不依韻。還請吟政。

京華傾蓋十年前。磊落嶽奇見此賢。解誦寶書七二國。熟精兵法十三篇。補天事業孤懷耿。覺世文章萬口傳。吾眼中人俱老矣。又經幾度海成田。

正道居主和余小寒節詩。悲悶惻惻。發人深省。賦此志感。

蛟鱓掀波不可馴。誰將寶筏渡迷津。蒼蒼有意援天下。預遣公爲彼岸人。

呂惠如女史詩選

和樊樊山年伯紅梅詩四首

春信新從赤道回。穠華先綻嶺頭梅。掃除冰雪開生面。點綴山川有異材。特色早邀傾國譽。此花纔合倚雲栽。東風夜半寒香發。誰擁彤霞下紫臺。

鐵石心腸綺麗身。品題誰是九方甄。擯開天竹憎頑豔。喚起山茶共好春。紅雨華鬢三界遠。彩雲明月一枝新。施朱褪粉吟皆俗。靚影真堪擬洛神。

一曲青琴撫落霞。酒香風冷月初斜。蠶珠夜燦珊瑚海。丹鼎春藏太乙家。悟得天真宜爛漫。修來穠福稱高華。化工特與增顏色。領袖江南十萬花。

杏繡桃緋識面遲。繡衣獨步早春時。光連牛斗虹應貫。香滿蓬萊燕未知。清廟朱絃傳雅唱。溫風旭日蕩奇思。廣平自具雕龍手。一掃郊寒鳥瘦詞。

呂坤秀女史詩選

憶蘭寫蘭

芳訊迢迢隔歲期。忽教千里起相思。春殘楚水雲橫處。夢遶湘皋月墮時。品逸香清難並世。環稀佩渺苦成詞。素縑難遍險糜翠。寫看含烟帶露枝。

鼓浪嶼呈仲姊

吾姊猶師保。天南形影依。課嚴詩漸進。遊久客忘歸。海屋圍空翠。蠻花謝晚緋。北瞻親墓遠。相共一沾衣。

殷齊德滌甫詩選

逍遙津秋游時有菊花之盛賦呈勛伯督部

弱水能耽寂寞花。子遺蟲鶴問方賒。吟衣秋薄兼談麈。獨鳥雲棲促暗笳。事異空函慚我後。槎回瀚海任人誇。池南儘有看雲地。願與眞游託後車。

寄懷瞿禪先生聞有出選詞選之輯賦此志佩

遊臥甯無在遠憂。故耽風雨自高樓。早從孤本懷淮海。定有歌魂託杜秋。一脈詩情雲共遠。幾回錦字譜堪留。名山不用邀人句。付與蠻牋詠客愁。

君寒先生見示寄舅之什依韻奉和

詩道仰彌高。望古猶嗟喟。相依待磨礪。陳言我未棄。欣讀寄舅篇。一一瀝血淚。思奇逼賈島。琳琅珍隻字。區中與外物。不足擾其志。優游典索區。哀切人天事。風騷代有人。江山終不異。

養素女士詩選

秋懷

唇市驚看海上樓。園穹冥晦變窮秋。居夷今日真無地。垂涕何人可道愁。幕燕已憐巢壘換。征鴻猶爲稻梁謀。誰令鐘簫千年器。盡化人間戟與矛。弱歲胡嗟塞上蓬。來看海月自遼東。日唯苦去顏難駐。詩不能工境未窮。歌到楚關傷古意。漫憐濁世自持躬。合圍敢望猶秋獮。南北何時共橐弓。



現代名家詩選終

中華民國廿五年五月出版

現代名家詩選

全書一冊 實價

外埠酌加郵費 匯費

有編者  
不輯者  
翻印准權

編輯者 汪君寒

校閱者 何銘

印刷者 上海達文書店

出版者 上海達文書店

發行者 上海達文書店

代發行所 上海四馬路新文化書社

## 新文化書社出版各名家詩集

詠物詩選	劍南詩鈔	白香山詩前集	白香山詩後集	銅版古唐詩合解	曾文正公十八家詩鈔	曾文正公詩集	隨園女弟子詩選	小倉山房詩集	紅豆村人詩稿	蘇曼殊詩集	白話註解唐詩三百首	唐詩三百首	白話註解千家詩	隨園詩話	陶淵明詩話	二晏詞	秦黃詞	斷腸詩詞	絕妙好詞	白香詞譜	曾文正公全集	王臨川集
洋裝一冊	洋裝二冊	洋裝二冊	洋裝二冊	洋裝二冊	洋裝四冊	洋裝一冊	洋裝一冊	洋裝四冊	洋裝一冊	洋裝一冊	洋裝一冊	洋裝一冊	洋裝一冊	洋裝一冊	洋裝一冊	洋裝一冊	洋裝一冊	洋裝一冊	洋裝一冊	洋裝一冊	洋裝廿八冊	洋裝四冊
定價一元二角	定價二元四角	定價一元八角	定價一元八角	定價二元八角	定價三元八角	定價三元	定價六元	定價三元六角	定價一元二角	定價八元	定價一元二角	定價六角五分	定價一元	定價二元	定價四元	定價四角五分	定價四角五分	定價七角	定價九角	定價七角	定價二十四元	定價四元八角

## 新文化書社出版各種國學名著

王陽明全集	蘇文忠全集	韓文公全集	蘇曼殊全集	袁中郎全集	龔定盦全集	陶淵明全集	李太白全集	飲冰室全集	載南山集	隨園全集	蘇曼殊小文全集	蘇曼殊詩文全集	蘇曼殊小說集	蘇曼殊文集	蘇曼殊譯作集	鄭板橋集	小倉山房文集	太平天國文鈔	評註四部路粹	經史百家雜鈔	經史百家簡編
洋裝四冊	洋裝四冊	洋裝四冊	洋裝四冊	洋裝二冊	洋裝二冊	洋裝二冊	洋裝六冊	洋裝四冊	洋裝二冊	洋裝廿八冊	洋裝二冊	洋裝二冊	洋裝一冊	洋裝一冊	洋裝一冊	洋裝一冊	洋裝三冊	洋裝一冊	洋裝四冊	洋裝四冊	洋裝一冊
定價五元	定價三元六角	定價三元六角	定價四元	定價六元	定價二元四角	定價一元	定價六元	定價五元	定價一元四角	定價二十二元	定價二元	定價二元	定價六元	定價六元	定價八元	定價四角五分	定價二元四角	定價七角	定價廿元	定價三元六角	定價八角

社址上海四馬路二六八號